



Uunga Inatsisartunut ilaasortaq  
Hans Enoksen  
Partii Naleraq

**Utoqqalinersiat utoqqarnullu inissiat pillugit § 37-imik apeqqummut nr. 153-2020-imut akissuteqaat.**

02-10-2020  
Suliap normua 2020 - 16437  
Allakkap ilisarnaataa 14916710

Asasara Hans Enoksen

Postboks 260  
3900 Nuuk  
Oqa. (+299) 34 50 00  
Nassitsigasuaat(+299) 34 66 66  
E-mail: iian@nanoq.gl  
www.naalakkersuisut.gl

Apequtinnut qujanaq. Apeqqutit ataani uteqqinneqarput akissummillu kinguneqartinneqarlutik.

**Apeqqut:**

**1. Nunatsinni utoqqalinersiutit kisimiittunut aappariinnullu annertussusaasa qaffaaffigineqarnissaat Naalakkersuisut sulissutigaa?**

Utoqqartatta utoqqalilluarnissaasa qulakkeerneqarnissaa Naalakkersuisut ukkataraat taamaammallu utoqqaat pillugit periusissiaq aallartissimavarput. Utoqqaat pillugit periusissiami utoqqaat atugaasa qanoq pitsanngorsarneqarnissaat ullutsinnullu naleqqussarneqarnerunissaat aqutissiorneqassaaq, ilaatigut ineqarnikkut atugassarititaasut, paaqqutarineqarnissamut isumassorneqarnissamullu neqeroorutit kiisalu utoqqartatta inuiaqatigiinni inuunermut peqataanissaannut uagut inuiaqatigiittut qanoq ikorfartuisinnaanerput ilanngunneqassallutik. Utoqqalinersiatigut atugassarititaasut ilutigittillugu aamma isiginiarneqassapput.

Innuttaasunut allanik isertitaqartunut utoqqalinersiat pitsanngorsarneqareerput. Pitsanngorsaaneq tamanna sapinngisamik sivisunerpaamik suliffeqarfeqarfimmiiginnarsinnaanermut kajumissaarineruvoq.

Utoqqalinersiaqartulli utoqqalinersiat saniatigut allanik isertitaqanngitsunik ilaqarput. Naalakkersuisunit taakku ukkatarineqarniarput atugaasalu pitsanngorsarneqarnissaat tulleriarinermi sallinngortissavagut.

**2. Nunatsinni ukiuni tulliuuttuni utoqqaat amerliartupiluussapput, tamanna Naalakkersuisut piareersimaffiga?**

**a. Taamatut ineriartortoqarnerata kingunerisaanik kommuneni utoqqarnut inissiat amerlanerit pisariaqartinneqalersussaanerat sulissutigineqarpat?**

Utoqqarnut suliassaqarfimmi inissiat amerlassusaat pillugit killiffissiuinerup tungaatigut qulaajaanermik Naalakkersuisut suliaqarlutik aallartinnikuupput. Utoqqaat pillugit periusissiasamat taanna qulaajaaneg ilisimasanut atortutut ilanngunneqassaaq

kingusinnerusukkullu suliassaqarfimmi immikkoortumut pilersaarummut ilanngunneqassalluni.

Utoqqarnut paaqqinnittarfinnut tunngatillugu kommunit sanaartornissanut 50 % tikillugu taperneqarnissamut qinnuteqarsinnaapput. Suliassaqarfimmut pilersaarutit inaarutaasut piareerpata aningaasat kommuninut nuunneqarnissaat sulissutigineqarpoq.

Utoqqarnut inissianik sanaartorneq annertusaanerlu kommunit akisussaaffigaat. Taamaammat utoqqarnut inissianut siunissami pisariaqartinneqartussanut piumasarineqartussanullu kommunit namminneerlutik iliuseqarsinnaapput.

Utoqqaat amerliartornerat Naalakkersuisut eqqumaffigaat. Narsami utoqqaat angerlarsimaffiannik annertusaallunilu aserfallatsaaliinissamut, Upernavimmi utoqqaat angerlarsimaffiisa aserfallatsaalinissaannut, Aasianni utoqqaat angerlarsimaffianni inissat 15-inik ilanissaannut kiisalu Maniitsumi Sisimiunilu puigortunngortunut immikkoortussaannik pilersaarusiornissamut tapiissutissanik maanna immikkoortitsisoqarsimavoq. Nutaanik sanaartornernut aserfallatsaaliinernullu AIS2021-imi 2021-mut, 2022-mut 2023-mullu 15,8 mio. kr.-inik aamma immikkoortitsisoqarpoq.

### **3. Utoqqaat imminnut naleqquttunik inissartinneqarnissaat anguniarlugu Naalakkersuisut suliniuteqarpat?**

Ineqarnermut Attaveqatigiinnermullu Naalakkersuisoqarfiup ilisimatitsissutigaa: *“Inissialiornissamut pilersaarusiornerni nutaajunerusuni sanaartukkat kinguaariinnit tamarmiusunit ilaqutariinnit inuusuttuniit utoqqarnut atorneqarsinnaanissaannik aaqqiissutinik Naalakkersuisut inerisaasimapput. Siunissami pisortat inissialiornernanni inissiat assigiinngitsunik atorneqarsinnaasunngorlugit aaqqissorneqarnissaat pingaartinneqarpoq, taamaalilluni nunassittarnerup pissusaata allanngorarnerata pilersitaanik assigiinngitsunik pisariaqartitsineq naammassineqassammat. Ilinniartut inissiaanik siunissami nutaanik pilersaarusiornissamut tunngavik tamanna aamma atorneqarpoq.”*

Utoqqaat amerlasuut sapinngisamik sivisunerpaamik namminneq iniminniiginnarusuttartut misissuinerit arlaqartut takutippaat. Utoqqaqarporlu aamma nammineq iniminni imminut paarisinnaannginnertik pissutigalugu utoqqarnut inissianut, utoqqarnullunniit angerlarsimaffinnut nuukkusullutik kissaateqartunik. Utoqqaat taamaammat assigiinngitsunik pisariaqartitsipput, tamannalu utoqqaat pillugit periusissiornermi ilanngunneqassaaq.

Inussiarnersumik inuulluaqqusillunga



Martha Abelsen